

2 Tımoteo

ingante Pabodo cadota ante ayænta nänö yewæmongainta

Tımoteo ingante Pabodo yewæmongampa

1 ¹ Botö Pabodobo inömo imopa. Wængonguï nänö änö bai Itota Codito nänö në da godongaïmo imopa. Itota Codito nempo quëwënönäni inönänite Wængonguï, Minitö wantæpiyæ mïni quëwenguïnö ante pönömo ænguimïni imïnipa, angacäimpa. Mänömaï beyæ tömengä botö imo, Mäninö ante apænebi ëñencädänimpa, angä ëñëningue botö tömengä nänö në da godongaïmo imopa. ² Tımoteo ëñëmi. Bitö botö wëmi bai inömi inte botö në waadebi inömi imipa. Bitö acæbiimpa, ante bitö imite yewæmömopa. Mönö Mæmpo Wængonguï tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopa.

Itota Codito waa pönï nänö ingainö ante

³ Wëëñënedë botö wæmæidi nani cægai bai botö adobai nämä apænte pönente adingue wentamö mongænämaï entawëmo inte Wængonguï beyæ në cæbo imopa. Botö itædë incæ woyowotæ incæ bitö beyæ ante mäningä Wængonguï ingante botö apæneyedë adocä ingante cówë waa ate pönente apænebopa. ⁴ Botö bitö æbänö wëñapæ tamömitapa, ante pönëningue, Botö watapæ tocæboimpa, ante bitö imite aïnente imopa. ⁵ Bitö Wængonguï ingante nö wede pönëmi imipa, ante adïmo inte botö adodö ante wæætë

pönëmopa. Edæ bitö ñæñæ Doida bitö wäänä Eönita tönö tömëna täno Wængonguï ingante nö wede pönente nana ingai bai bitö inömo ñowo adobai imipa, ante do ëñëmopa.

⁶ Mänömaï beyæ bitö imite iïmaï ämopa. Wængonguï nänö cædönö ante bitö cæcæbiimpa, ante botö bitonga gampo cæyömo Wængonguï pönö cæcä æningue ewocabi imipa. Inique mäninö bitö ewocadö beyænque bitö godömenque godömenque cæcæbiimpa. ⁷ Wængonguï tömengä Tæiyæ Waëmö Önöwoca ingante mönö imonte pönongä æmö inique mönö wïi tömengä beyæ guïñente ewocamompa. Wæætë mäniwoca beyæ tæi ewocamö imompa. Ayæ adowoca ingante ewocadinque waodäni inänite waadete pönëmö imompa. Adowoca beyæ mönö, Nöinö cæcæimpa, ante pönëningue nämä wææ ante cæmö imompa.

⁸ Mönö Awënë Itota Codito nänö angainö bitö ëñëninö ante bitö guingo imönämaï inte apæncæbiimpa. Botö adobai, Tömengä nänö angainö botö ëñëninö ante botö apænebo beyæ botö imote tee mönedäni wæyömote bitö mäninö adingue guingo imönämaï inte apæncæbiimpa. Wæætë botö tönö Itota ingantedö ante möna watapæ apænedö ante apænedingue bitö Wængonguï nänö tæi piñämämo ante ewocadinque botö tönö adobai guëa caate wæcæbiimpa.

⁹ Wængonguï, Quëwencæminimpa, ante mönö imonte æningue, Minitö tæiyæ waëmö entawente quëwencæminimpa, ante mönö imonte aa pegacäimpa.

Mänömaï cædinque tömengä wīī mönō waa cædinō beyænque wæætē tömengä nänō ainēnō ante cægacäimpa. Ayæ wēēnēdē inguipoga badönāmaï īfēdē tömengä, Itota Codito beyænque, ante pönēninque mönō īmonte waadete pönō cægacäimpa. Mäninō nänō waadete pönō cægainō beyænque tömengä mönō īmonte æninque aa pegacäimpa.

¹⁰Incæte ñwoyedē mönō īmonte, Quēwenguimīni, ante nē Ængaingä Itota Codito pongä īninque tömengä waadete nänō pönō cægainō ante edonque odömongantapa. Ayæ Itota ingantedō ante mönō watapæ apænedō beyæ tömengä, Minitō mempoga wänāmaï incæminimpa, ante cædinque wantæpiyæ wänāmaï mönō quēwenguimāmo ante edonque odömongacäimpa.

¹¹Wængonguī botō īmote apænedinque, Itota ingantedō ante watapæ botō apænedō ante bitō apænebi ēñencädänimpa, angantapa. Angä ēñēninque botō adobaï tömengä nänō nē da godōmo īmo inte ayæ nē odōmonte apænebo īmopa. ¹²Mänīī beyæ botō mänömaï wæwente quēwēmopa. Incæte, Æcänō ingante nē wede pönēmo īmopa, ante do ēñēmo inte botō guingo imönāmaï īmopa. Edæ botō quīnō tömengä ingante godönīmo incæ tömengä mäninō æninque nanguī tæī ewocacä īnogä inte tömengä nänō apænte anguīönæ ganca wææ cæcæcäimpa. Mäninō ante botō ædæmō ēñēmopa.

¹³Botō bitō īmite odōmonte apænebo bitō ēñēninō ante bitō ñimpo cædāmaï ee nææncæbiimpa. Wæætē, Mäninō nō ante mönō adodō adodō ante odōmonte apænedō impa, ante bitō adobaï adodō ante odōmonte apænecebiimpa. Mönō Itota Codito nempo quēwēmi inte wede pönēninque waadete pönente odōmonte apænecebiimpa. ¹⁴Wængonguī, Wææ aacæbiimpa, ante bitō īmite pönongä ænīmi inte bitō tömengä waa pönī nänō pönongainō ante wææ aacæbiimpa. Edæ mönō Wængonguī Önōwoca tönō ewocate quēwēmoppa. Īninque

bitō tömengä tönō cædinque wææ aacæbiimpa.

¹⁵Atiabæ quēwēnāni īñömō tömänāni botō īmote emō cæte godänitapa, ante bitō do ēñēmipa. Edæ Piguado tönō Edömogænæ incæ tömēnāni tönō botō īmote emō cæte godatapa. ¹⁶Önetipodo guiquēnē botō wæwēmo adinque tömengä wæætē wæætē pönō cæcä beyænque botō wampo pönentabopa. Ayæ adobaï botō īmote yæguincamē inte ñä cæyænte tee mönedāni wæyōmote tömengä guingo imönāmaï ingacäimpa. Īninque tömengä tönō godongämæ quēwēnāni inänite mönō Awēnē Itota Codito waadete pönō waa cæcæcäimpa, ämopa. ¹⁷Edæ Odömä nāni quēwēñömō īñömō pöninque Önetipodo botō īmo ante nanguī diqui diqui mininque ate ate ĩnque mingacäimpa. ¹⁸Botō Epeto nāni quēwēñömō mänīñömō quēwēñōmote tömengä æbänō botō beyæ pönō nanguī cæcantapa, ante bitō do ædæmō ēñēmipa. Mänömaï beyæ botō ĩnque baquīönæ īñonte Wængonguī tömengä ingante pönō waadete waa cæcæcäimpa, ämopa.

Itota Codito beyæ waa tontado bai cæcæimpa

2 ¹Ayæ bitō botō wēmi bai inömi inte ēñēmi. Itota Codito nempo quēwēñōmite tömengä waadete pönō cæcä beyænque bitō tæī ewocabi incæbiimpa, ämopa. ²Wadāni tæiyænāni ēñēñönāni botō æbänō ante apænebo bitō ēñēninō inte bitō wæætē wadāni nē pönēnāni inte cōwē ædæmō cædāni īñönānite adodō ante odōmonte apænebi ēñencädänimpa. Ēñēninque tömēnāni nē nō cædönāni inte adobaï wadāni inänite odōmonte apænequīnāni inänipa, ante tömēnāni inänite ämi gocædänimpa.

³Bitō Itota Codito beyæ waa tontado bai inömi inte bitō wæwēmi incæ ee ongote godōmenque cæcæbiimpa, ämopa.

⁴Wacä tontado badinque nänō cæyedē tömengä, Botō awēnē botō īmote waa acæcäimpa, ante tömengä nänō änonque

ante ēñente cæcæboimpa, āninqe wadāni tontado īnāmaī īnāni nāni cæbaī cædāmaī īnongā ingampa. ⁵Gānā cæcæte ante nē owempocā īñōmō, Cōwē nāni cægai bai owempocēdāni, ante nāni wææ angainō ante ēñente cæcā īninqe tōmenganque godōmenque waa owempodinqe gānā cædinque poganta æmaingampa. ⁶Amiña bayedē pancamonga pancamonga æññōnāni gōnea ante nē nangui cæcā īñōmō tōmengā tāno quēwēnengā ingampa. ⁷Mānīnō īmæca quēwēnāni nāni cæ bai ante mēnea go adodeque botō ānīnō ante pōnēñōmi mōnō Awēnē edæ bitō īmite odōmongā ēñēninqe bitō edonque pōni ēñencæbiimpa.

⁸Itota Codito awēnē Dabii wodi nānō pæingā īnongā inte do wæninque nē nāni ōmæmongaingā ingante ante pōnencæbiimpa. Mānīnō ante watapæ botō apænedō impa. ⁹Mānīne beyænque botō caate wæwēmo īmopa. Edæ nē wēnæ wēnæ cæcā ingante tee mōnecōnē nā cæyænāni bai botō īmote adobai mānīne botō apænedō beyænque nā cædāni wæbopa. Incæte Wængongui nānō angainō ædō cæte nā cæyænte inguii. ¹⁰Mānōmaī beyæ Wængongui nānō apænte ænīnāni beyænque ante cæyōmote wadāni anca wēnæ wēnæ cædāni wæbo incæte botō nīmpo cædāmaī inte godōmenque cæbopa. Edæ Wængongui nānō nāo apāiyōmō nāni cōwē quēwenguinque mānīnāni Itota Codito ængā beyænque tōmengā nempo quēwencædānīmpa, ante cædinque botō wæwēmo incæte godōmenque cæbopa.

¹¹Īmaī ante nāni ānō nāwangā ante impa.

Mōnō Itota Codito tōnō godongāmæ wængaimō inte adobai tōmengā tōnō cōwē wænāmaī quēwencæmōimpa.

¹²Mōnō tōmengā tōnō nīmpo cædāmaī inte ee cæte wæwēmo inte adobai tōmengā tōnō nē awēnēidi badinque godongāmæ aacæmōimpa.

Mōnō, Tōmengā ingā dicæ abogaa, āmō īninqe tōmengā adobai

næmæ mōnō īmonte, Dicæ abogaa, āmaingampa.

¹³Mōnō wede pōnēnō ante ædæmō cædāmaī īmō incæte tōmengā guiquēnē mōnō īmonte cōwē pōnēninqe cōwē ædæmō cædongā ingampa.

Īnæmpa tōmengā īñōmō nāmā nānō ingainō ante nīmpo cædāmaī īnongā inte tōmengā wadō ante pōnēnāmaī ingampa.

Wængongui bitō īmi, Waa cæbi abopa, anguingā, ante

¹⁴Waadāni īnānite apænedinqe bitō, Mānīnō ante pōnēedāni, ante wæætē wæætē ancæbiimpa. Mōnō Wængongui ayongā Īmaī ante wææ ante nangui apænebi ēñencædānīmpa. Mīnitō, Ædedō ī, ante wadodō wadō ante pīinte tededāmaī incæminīmpa. Īnæmpa mānōmaī bai āninqe mōnō ānō īñōmō ōnonque ante impa. Ayæ mānōmaī ante tedemō ēñēninqe nē ēñēnāni īñōmō æmæ pōnente babainānīpa, ante bitō wææ ancæbiimpa, āmopa.

¹⁵Bitō Wængongui ayongā, Botō nē waa cæbo incæboimpa, ante nangui cæcæbiimpa. Nē cæbo inte guingo imōnāmaī incæboimpa, ante cædinque Wængongui nō nānō angainō ante tōmēmi nē ædæmō ēñente entawēninqe mānīnonque ante tōinō ante wadāni īnānite waa odōmonte apænecæbiimpa.

¹⁶Tæiyæ waemō ewocadāmaī inte wadāni ōnonquedō ante tedeyōnāni bitō tōmēnāni īnānite ēñēnāmaī inte nānēnē wadæ goe. Edæ mānīnāni Wængongui ingante emō cædinque cōwē godōmenque wīwa nāni cæquinque wadæ godānīpa. ¹⁷Baō nōmæīñōmō aca podinque nangui godōmenque baayō bai mānīnāni nāni odōmonte apænewēnō adobai wodo wodo go īninqe wadāni tæiyænāni ēñēninqe oda cæcædānīmpa.

Mānīnāni nāni tedewencabo īññōnāni Īmēneo tōnō Pideto adodaque īnāpa.

¹⁸Tōmēna Wængongui nāwangā nānō angainō ante nīmpo cæte wadæ godīna īnāpa. Ayæ, Mōnō nāni

ömæmönö iñömö iinque bagatimpa, ante tedewëna ëñëningue wadäni pancadäniya nani wede pönëno incæ wido cæte bai quëwënanipa. ¹⁹Incæte Wængongui näwangä nänö angainö mönö pönëno iñömö tæi gönonte bai cöwë ongompa. Mäninö ante mënea ante iïmai yewæmonte bai ongompa. Edæ Wængongui Awënë tömengä quinäni ædänidö inänii, ante do ëñengampa. Ayæ tömengä ëmowo ante, Botö Awënë inongä ingampa, ante nê änäni iñömö tömënanï tömänäni, Mönö wiwa cædimämo ante wæte wædingue wadæ goquënënanï inänipa.

²⁰Nê ëacä oncönë fiænæncönë tömengä nänö waa waa cö cæincade iñömö oodo inte padata inte nani badöincade mä ongompa. Adobaï wacade awæpaincade daicade incade mä ongompa. Pancacadea iñömö waëmoncooque da wëincade incadepa. Wacade guiquënë ömæpocoque da wëincade incadepa. ²¹Waocä wënæ wënæ nänö entawënö ante ñimpo cædinque nämä ñä mënongate bai quëwengä iinque tömengä iñömö waëmoncooque da wëincade bai inongä inte Wængongui beyæ waa cæcä iïmaingampa. Tömengä tæiyæ waëmö ëwocate quëwengä babaingampa. Iinque tömengä Awënë nänö änö ante do cæcä iïmaingampa. Ayæ, Quinö waa cæquinö i, ante tömengä do cæcä iïmaingampa.

²²Edëninäni wiwa nani cæinënö ante bitö ñimpo cæte wodii gote bai quëwencæbiimpa. Wæætë woadäni mimö ñä mënongate entawënanï inte Wængongui ingante nê apænedäni tönö bitö nö cæquënëno ante cæte quëwencæbiimpa. Mönö wede pönëno ante godömenque pönente quëwencæbiimpa. Woadäni inänite godömenque waadete pönencæte ante cæcæbiimpa. Ayæ mönö piyænë cæte quëwenguimämo ante pönëningue cæcæbiimpa. ²³Önonquedö ante apænedinque nê, Ædedö i, ante wacä tönö guëadö guëa tedewengä mänömaï

tedecä beyænque wadodö wadö piinte tedewënanipa, ante do ëñëmipa. Iinque tömënanï nê pönënamäi inäni inte önonquedö ante apæneyönäni bitö tömënanï tönö godongämæ apænedämäi incæbiimpa.

²⁴Mönö Awënë ingante nê cæcä iñömö tömengä wadäni tönö wadodö wadö piinte tededämäi incæcäimpa. Wæætë tömänäni inänite ædæmö cæcæcäimpa. Ayæ wadäni tömengä ingante wënæ wënæ cædäni adinque tömengä wæætë piïnamäi inte piyænë cæcæcäimpa. Ayæ tömengä nê waa odömonte apæneçä incæcäimpa. ²⁵Tömengä apæneçä ëñëningue nê ëñënanï iñömö Baa ante wadö änäni inänite tömengä ædæmö cæte, Iïmai impa, ante odömonte apæneçä ëñencädänimpa. Edæ Wængongui pönö cæcä ate tömënanï nämä incæ, Wënæ wënæ cæmö awædö, ante wædingue tömengä näwangä nänö angainö ante ëñencädänimpa, ante pönente cæcæcäimpa. ²⁶Ayæ tömënanï ëñënamäi encädäni incæ nê ëñenguinänï wæætë bacädänimpa, ante pönente cæcæcäimpa. Wënæ iñömö tömënanï inänite bæi ongöningue tömengä, Botö änö ëñente quëwencæminimpa, ante godö cæcä ate tömengä nänö nê bæi ongönäni wæætë aamö cæte wodii gocädänimpa, ante adobaï pönente cæcæcäimpa.

Iinque bayedë woadäni æbänö quëwenguinänii, ante

3 ¹Tímoteo ëñëmi. Iinque ëönæ bacæ cæyedë wënæ wënæ ba wæquinö anguënë. ²Mäniñedë edæ woadäni nämanque waadete pönenguinänï inänipa. Tömënanï nani godonte æninta waadete pönente nani wædö ante quëwenguinänï inänipa. Tömënanï nämanque, Botö gomonga waa cæbo imopa, ante pönenguinänï inänipa. Wængongui ingante godö wënæ wënæ ante babæ anguinänï inänipa. Wadäni inänite badete toquinänï inänipa. Wëñænäni incæ wæmpoda inate ëñënamäi cæquinänï inänipa. Wadäni

pönö waa cädäni incæte tömënäni nê waa cädäni inänite wæætê waa cädämaï inguinäni inänipa. Ayæ tæiyæ waemö entawënämaï inguinänimpa. ³Adobaï waadete pönënämaï quëwenguinäni inänipa. Mäninäni inänite wënæ wënæ cädäni adinque tömënäni wæætê pīinque ñimpo cädämaï inte wënæ wënæ cæquinäni inänipa. Wadäni inänitedö ante babæ ante änewenguinäni inänipa. Tömënäni nani cæinwëwönö ante nämä wææ änämaï inte do cæquinäni inänipa. Ayæ wadäni inänite ædæmö cädämaï inte piunte cæquinäni inänipa. Wadäni, Quinö waa impa, ante piinguinäni inänipa. ⁴Tömënäni nani guidënäni incæ, Wënæ wënæ bate wæcädänimpa, ante godö odömonguinäni inänipa. Tömënäni pönënämaï inte do wënæ wënæ cæquinäni inänipa. Tömënäni nämä incæ, Botö gomonga waa ëñëmopa, ante pönëwenguinäni inänipa. Wængonguï ingante waadete pönënämaï inguinäni inte wæætê tote quëwengæimpa, ante namanque waadete pönenguinäni inänipa. ⁵Tömënäni Wængonguï ayongä waa cæte quëwënäni bai adobaï cädäni incæte Wængonguï nänö tæi pīñämämö piwëninque namanque cæte quëwënanipa töö.

İnque bitö mäninäni inänite gomö ae. ⁶Mänömaï bai cädäni iñömö waa apænedinque waodäni oncönë wäänë guidänipa. Onquiyænäni wīi tæimö entawënäni inte tömënäni nani wënæ wënæ cædi teëmëmö mongænte bai inäni iñönänite oncönë nê guidäni iñömö, Onquiyænäni monitö apænedö ante ëñente cæcädänimpa, ante cädäni ate onquiyænäni wæætê oda cæte godänipa. Mäninäni onquiyænäni iñömö, Quïëmë nani wënæ wënæ cæinëmämö, ante wadö gote wadö gote oda cädänipa. ⁷Tömënäni cöwë ëñencæte ante cädäni incæte wapiti wapiti cädäni ininque Wængonguï näwangä nänö angainö ante cöwë ëñente badämaï inänipa. ⁸Wëñëñedë Möitee wodi Equitobæ tæiyæ awënë ingante apæneyongä Aänee

tönö Aämodee nê idöna inte Möitee ingante pīinque, Önonque angampa, äna ingadäimpa. İnque bayedë nê wënæ wënæ cädäni guiquënë iina inöna nana cægai bai adobaï cædinque Wængonguï näwangä nänö angainö ante Baa ante wadö änäni inänipa. Tömënäni ocaidë pönente wentamö encadäni inte oda cæte godänipa. İnque Wængonguï ingante mönö pönëmämö incæ dica pönënäniyaa. Wængonguï tömënäni inänite Baa ancæcäimpa. ⁹İñæmpa ædö cæte godömenque cæquinänii. Mänina nê idöna nana önonque cægainö ante edonque agadäni bai tömënäni nani önonque cædinö ante waodäni tömänäni adobaï edonque pönä acädänimpa.

Tımoteo ingante Pabodo iınque wææ angampa

¹⁰Bitö iñömö, Æbänö botö odömönte apæneboo, ante, Æbänö waa quëwëmoo, ante, Æbänö pönente ante, İimaï cæcæboimpa, ante cæboo, ante bitö tömänö ante do ëñëmipa. Ayæ Wængonguï ingante botö pönëmämö ante waodäni inänite botö ee cæpämö ante botö waadete pönëmämö ante botö wæntædämaï inte cæpämö ante bitö adobaï do ëñëmipa. ¹¹Ayæ botö imote togænte pänäni botö wæpämö ante ayæ botö wæwëmämö ante bitö do ëñëmipa. Wadäni quïëmë wënæ wënæ cæcæte ante botö imote togænte pänäni wæbo incæ botö wæntæye inämaï intabopa. Antioquiya iñömö İcönio iñömö adobaï Ditada nani quëwëñömö mäniñömö wënæ wënæ cädäni wæbo incæte mönö Awënë ö ængä beyænque ayæ quëwëmö imopa. ¹²Nö ante impa. Æcänö, Botö Itota Codito nempo quëwëmö inte Wængonguï ayongä waa cæte quëwencæboimpa, ante äna tömengä ingante togæwëninque wënæ wënæ cädäni wæqingä ingampa. ¹³Waodäni wënæ wënæ cädäni tönö, Oda cæcädänimpa, ante nê cädäni iñömö tömënäni nê wënæ wënæ cædinäni inte godömenque wënæ wënæ cæquinäni inänipa. Edæ mäninäni inänite wapiticæ

mäodäni oda cæte cædinäni inte tömënanäni wæætë wadäni inänite adodö, Æpiticæmë oda cæquinänidö, ante cæcædänimpa.

¹⁴Bitö guiqüënë æbänö ëñëniimi inte, Nö impa, ante pönëninque cöwë ñimpo cædämaï incæbiimpa. Edæ bitö ïmi ædänidö odömonte apænedäni, ante do ëñëmipa. ¹⁵Wængonguï angä ëñente tæiyæ waëmö nani yewæmongainö ante bitö wëñæmiyedë mä ëñëninque ñowo ganca do ëñëmitawo. Mäninö ante nani yewæmongainta ate ëñëninque bitö Itota Codito ingante pönëñömi tömengä ængä beyænque quëwencæbiimpa.

¹⁶Wængonguï pönö apænecä ëñëninque waodäni tömënanäni nani ëñënonque ante Wængonguï beyæ yewæmongadänimpa. Tömënanäni Wængonguï nänö odömonte apænecäinö ante nani yewæmongainta adinque mönö, Æbänö waa impa, ante ëñëninque mönö odömonte apænecæiimpa. Wængonguï angä ëñente nani yewæmongainta adinque, Quinö mönö wënæ wënæ cædinö ïi, ante mönö do ëñëninque nê wënæ wënæ cæcä ingante mönö wææ angæiimpa. Ayæ Wængonguï angä ëñente nani yewæmongainta adinque nê oda cæte wæcä ingante, Mönö nöinö cæquënëñö ïimaï impa, ante mönö odömonte apænecæiimpa. Nö cæte quëwencæminimpa, ante odömonte apænete ongö ate mönö ëñëñö ante mönö waodäni inänite odömonte apænecæiimpa. ¹⁷Edæ Wængonguï beyæ nê odömonte apænecä ïñömö eyepæ ëñengä inte tömengä nänö waa cæquimämo tömämämo ante cæcæcæiimpa, ante odömonte apænecæte ante yewæmongadänimpa.

4 ¹Waadäni miinäni quëwënanäni incæ do wængainäni incæ tömänäni inänite mönö Itota Codito nê apænte anguingä inte tömengä Awënë Odeye badinque ponte a ongongä acæiimpa. Tömengä ayongä ayæ mönö Mæmpo Wængonguï ayongä botö bitö imite, ïimaï cæe, ämopa. ²Wængonguï nänö apæinö ante apænebi ëñencædänimpa.

Waadäni Ao ante, Ëñëinëmöni ante änäni incæ Baa ante ëñënamäi inäni incæ bitö cöwë apænebi ëñënanie. Wængonguï nänö angainö ante oda cæte wædäni adinque bitö, Mönö nöinö cæquënëñö ante cæcæminimpa, ancæbiimpa. Wënæ wënæ cædäni inänite, Ædö cæte mänömaï cæminii, ante nanguï ancæbiimpa. Ayæ adobaï, Wampo pönencædänimpa, ante ædæmö apænebi ëñencædänimpa. Mäninö tömänö cædinque nanguï waadete ee cædinque adodö adodö ante odömonte apænebi ëñencædänimpa.

³Ïincayæ ate nö odömonte mönö apænedö ante waodäni Baa anguinäni inänipa. Mäninö ante ëñënamäi incæmönimpa, ante änäni inte tömënanäni wæætë, Mönö ëñëinënnonque ante odömonte apænecædäni, ante nê odömonte apænecædönäni nanguï inäni inänite diqui diqui minte acædänimpa. Mäninuedö ante ëñencæmönimpa, ante anguinäni inänipa. ⁴Mäninäni näwangä angainö ante ëñënamäi inte wadæ godinque wæætë önonquedö ante dodäni nani angainö ante ëñente cæquinäni inänipa. ⁵Bitö guiqüënë tömëmi quëwenganca æbämë baquïi incæ godömenque cæcæbiimpa. Caate wæbi incæte bitö ñimpo cædämaï inte godömenque cæcæbiimpa. Wængonguï waa pönö nänö apænecædö ante apænebi ëñencædänimpa. Bitö cæquënëñö tömää ïinque cæcæbiimpa.

⁶Wængonguï quï, ante nani godönö baï botö adobaï ïñömöte wantæ ïñonte wænönäni wæncæboiimpa. Edæ botö wænguïönæ oo pönö impa. ⁷Botö tæi ewocabo inte Awënë Itota beyæ botö cæquënëñö waa pönö ïinque cætabopa. Gänä cæcæte ante nê pogodo godäni næ gongænämaï nani ïinque gonganca godäni baï botö adobaï tömëmo quëwenganca wæntæye inämaï inte ïinque cætabopa. Mönö wede pönëñö ante botö ñimpo cædämaï inte cöwë pönentabopa. ⁸Mönö Awënë nê nö apænte anguingä ïñömö tömengä nänö apænte anguïönæ ïñonte tömengä, Bitö

nö pönente waa cædīmi inte bitö waa cædīnta ante poganta æncæbiimpa, ante botö imote pönongä æncæboimpa. Wīi botö adoboque iñömote pönongä æncæboimpa. Wadāni adobaī tōmengä nānō pongä aquíōnæ ante nanguī aīnente nē wānō cōnāni ināni adīnque tōmengä, Mīnitö nö cæte quēwēnīmīni inte mīnitö waa cædīnta ante poganta æncæmīnīmpa, ante tōmēnāni tōmānāni inānite pönongä æncædānīmpa.

Tımoteo quīnō cæcæcāīmpa, ante

⁹Bitö eyepæ inte botö weca quingæ pöe, ämopa. ¹⁰Deēma iñömō inguipogaque ante botö imote emō cæte Tetadōnica nāni quēwēñomō gocantapa. Ayæ Quedetente iñömō Gadatiabæ iñömō gocantapa. Adobaī Tito Dadāmatīabæ iñömō gocantapa. ¹¹Odoca adocanque botö weca ongongampa. Māadoco ingante adīnque tōmengä ingante botö weca ænte māmōmi pongāi. Edæ botö cæquēnēnō ante cæyōmote tōmengä botö tōnō guēa nanguī cæcā ingampa. ¹²Ayæ Tīquico ingante botö Epeto iñömō da godōmo gocantapa. ¹³Botö yacoo ocoi ä weocoo Todoa iñömō Cadopo oncōnē botö emō cæte pōnincoo bitö ponte ate ænte pöe. Adobaī botö dibodocoo ænte māmōmi æmoe. Botö tæīnetacoo yewæmōīntacoo, ante godōmenque wæbopa. Mānīnta cōwē māmōmi æncæboimpa, ämopa. ¹⁴Adecantodo tæīneta nē badongä īnongä iñömō botö imote nanguī wēnæ wēnæ cæcā wætābopa. Mānōmaī cæcā adīnque Wængonguī edæ tōmengä nānō wēnæ wēnæ cædīnganca māninganca tōmengä ingante wæætē pancæcāīmpa, ämopa. ¹⁵Māningä bitö īmite adobaī wēnæ wēnæ cædāmaī incæcāīmpa, ante bitö adobaī wææ cæcæbiimpa. Edæ mōnō odōmonte apænedō ante tōmengä cōwē Baa ante wadō ante quēwēnongä ingampa.

¹⁶Botö imote nē apænte ānongä weca ænte māodāni gote ongōnīnque botö nāmā incæ wææ ancæte ante mā apæneyōmo æcānō botö tōnō godongāmæ

āna edæ dæ ānāni wætābopa. Tōmānāni edæ botö imote emō cæte wadæ godānitapa. Mānōmaī nāni cædīnō beyæ Wængonguī tōmēnāni inānite pīīnāmaī incæcāīmpa, ämopa. ¹⁷Incæte, Wadāni wīi oodeoidi ināni tōmāmæ quēwēnāni Wængonguī waa pōni nānō apænedō ante ēñencædānīmpa, ante cædīnque mōnō Awēnē iñömō botö gāānē ongōnīnque botö tōnō godongāmæ cæcā beyænque tæī ewocabo inte apænetābopa. Īīmæca awēnē nempo wæwente quēwēñomote mōnō Awēnē wæætē gā pe æmpote ö ængä beyænque quēwēmopa. ¹⁸Mānōmaī baī cædīnque botö imote quīēmē wēnæ wēnæ cædāni wæbo incæ mōnō Awēnē Odeye botö imote ænguingä beyænque quēwencæboimpa. Adobaī tōmengä öönædē nānō aayōmō botö imote adīmongä ænte mæicā æite goquīmo īmopa. Wængonguī nāō apāite baī emōnongä ingante mōnō cōwē waa acæīmpa, ämopa. Mānōmaī babāīmpa, ante Amēē, ante ämopa.

Tımoteo ingante Pabodo, Waa quēwencæbiimpa, angampa

¹⁹Pidica tōnō Aquidæ nāna gæncayā waa quēwencædāīmpa, ämopa. Bitö tōmēna īnate adodō apænebi ēñēnae. Adobaī Onetipodo tōnō godongāmæ quēwēnāni waa quēwencædānīmpa, ämopa. Bitö tōmēnāni inānite adodō apænebi ēñēnānie. ²⁰Edaato Coodinto iñömō ayæ a ongongantapa. Ayæ Todopīmo nē wēnæ wēnæ īñongä botö tōmengä ingante Mīideto iñömō emō cæte gotābopa. ²¹Bitö eyepæ inte cōnædepo badāmaī īnedē botö weca quingæ pöe, ämopa. Eobodo iñömō tōmengä, Bitö waa quēwencæbiimpa, angä ēñēnīnque botö bitö īmite adodō āmo ēñēe. Podænta tōnō Dīino ayæ Codaodia tōnō mōni pōnencabo tōmāmōni bitö īmite, Waa quēwencæbiimpa, āmōnīpa.

²²Mōnō Awēnē Itota Codito bitö tōnō ongōnte incæcāīmpa, ämopa. Ayæ Wængonguī bitö īmite waadete pōnō cæcæcāīmpa, ante mānīnque ante yewæmōmopa.